

Exkalabur

– der Song –

Refrain:

Exkalabur, i sueche di, Exkalabur wo bisch au?
Ich zieh di us em grosse Schtei,
ou nei, ich schaffe's nid elei
Ich bring no es paar Fründe, Feeä, Magier und en Drache.
Und öpper weiss en Zauberschpruch, die andre riessed fescht – hau ruck –
Und dusse bisch, und s'Tor goht uf
Ine gheimnisvolli Wält!

1. Am Ritterfäscht, do riited d'Ritter fäschtlech hin und här.
Der einti schtosst der ander mit em Schpiess vom höche Ross
D'Prinzässin goisset luut und schpringt vor Ängschi zrugg is Schloss,
und nöimed tanzt en Narr und tuet eso wie wenn nüt wär.
2. Grad näbedraa isch Johrmärt, uf em Schpiess do träät es Schof.
De Puur vo Nibelunge bietet Ringelblueme aa.
Hühner gaggered, d'Minnesänger schtimmed Lieder aa
Und en Narr macht Gschpäss, und bringt en arme Bättler ume Schlof

Refrain

3. Hebed euchne Seele sorg, drum losed! schreit scho glii
De Ablasshändler unablässig, und wird debii riich
En Kupferschmid, de schmidet grad en Kupferreif für dich
Und en Chrüttertokter quakt und salbt em Narr sys Holzbei ii.
4. Innere Chugle us Kristall, do list en alti Frau.
De Erzbischof vo Erzetal und dä vo Chlisteihuus
Die chrazed a de Glaze, will si chömed beid nid druus,
Nur en Narr, de lauft dezue und gseht die Zeiche au.

Refrain

5. Am Obe schpilt en Lyra zart en schöni Melodie.
De Narr het d'Chappe abgleit und e Flöte füre gno.
S'Tor goht wieder zue, doch du und ich mir wüssed scho
Exkalabur, mir findet immer wieder zu dir hii!

Refrain